

11/2023 Foru Dekretua, ekainaren 13koa, Gipuzkoako Elkarrizketa Zibilerako Mahaia sortzen eta arautzen duena.

(2023ko ekainaren 26ko 122 zk.ko GAO)

OHARRA

Testu hau dibulgaziozkoa da soilik, eta ez du inolako izaera ofizialik. Araua osoa eta eguneratua jasotzen da bertan.

HITZAURREA

Euskadiko Hirugarren Sektore Sozialari buruzko maiatzaren 12ko 6/2016 Legearen 7. artikulua arautzen du elkarrizketa zibila eta foru aldundiei hainbat mandatu ezartzen dizkie, tresna egokien bidez elkarrizketak izan ditzaten Euskadiko Elkarrizketa Zibilerako Mahaiaren pare, baina beren lurraldean jarduten diren hirugarren sektore sozialeko sareekin.

Bestalde, Gipuzkoako Lurralde Historikoaren Erakunde Antolaketa, Gobernu eta Administrazioari buruzko uztailaren 12ko 6/2005 Foru Arauaren 18. artikulua xedatzen du Foru Aldundiaren arautzeko gaitasuna zabaltzen dela Autonomia Erkidegoko edo Estatuko legeak garatzeko foru dekretuak ematera. Eta gaineratzen du Foru Aldundiari dagokiola antolamenduko araudiak onartzea.

Ondorioz, Foru Aldundiari dagokio foru dekretu bidez betetzea lehen aipatutako maiatzaren 12ko 6/2016 Legean Gipuzkoako Elkarrizketa Zibilerako Mahaia sortu eta arautzeko ezarritako mandatua, Gipuzkoako Lurralde Historikoko ekintza sozialeko hirugarren sektorearen elkarrizketarako eta instituzioetan parte hartzeko tresna gisa; Diputatuen Kontseiluari dagokio onartzea, maiatzaren 12ko 6/2005 Foru Arauaren 31.1.f) artikuluan aurreikusitakoaren arabera.

Historikoki, Gipuzkoako hirugarren sektore sozialak eskatu izan du Gipuzkoako Foru Aldundiaren plan eta programen prestakuntzan parte hartzea. Gipuzkoako gizarte nabarmentzen da esku-hartze sozialeko hirugarren sektoreko irabazi asmorik gabeko entitateen lanagatik, ekintza boluntarioagatik eta elkertasun antolatuetatik. Horrela, gogora dezakegu 2004an boluntarioak dituzten hirugarren sektoreko zenbait entitatek sortu zutela Sareginez entitateen sarea, irabazi asmorik gabeko hogeiren bat erakunderen artean, boluntarioen laguntzarekin, eta sare horrek lanean dihardu eta jarraitzen du modu oso aktiboan ekintzak burutzen. Beste aurrekari garrantzitsu bat izan zen Gipuzkoan entitate sozialak koordinatzeko Sargi elkartearen sortzea; horrek ere sarean lanean dihardu.

Gizarte zerbitzuetan eskumena duen Gipuzkoako Foru Aldundiko departamentuak gizarte ekimeneko parte hartzea sustatzeko egiten dituen ekintzei dagokienez, azpimarratu behar da

Elkar-Ekin 2022-2026 Gipuzkoako II. Gizarteratzeko Plana egin izana, jarraipena ematen baitio aurreko planaren ebaluazioarekin hasi zen lanari eta oinarritzen delako Gipuzkoako gizarteratzeko gizarte zerbitzuen sarean inplikaturako eragileei. Plan hori oinarritzen da, batetik, Foru Aldundiaren lidergoan eta, bestetik, entitate eta erakunde ugariaren borondatezko aliantzan. Era berean, Foru Aldundiaren Etorkizuna Eraikiz ekimena prozesu sistemiko bat sustatzen ari da, administrazioaren eta herritarren eta eragile sozial eta ekonomikoen arteko harreman eredu berri bat sustatzen duena, lankidetzaren gobernantza baten esparruan oinarritutako eredu bat, hain zuzen.

Orain arte aipaturako ekimenez gain, Gipuzkoako Lurralde Historikoan gizarte partaidetzako beste foro espezifiko batzuk daude, hala nola Adinekoen Kontseilua, Desgaitasuna duten Pertsonen Kontseilua edo Gipuzkoako Lurralde Historikoko Gizarteratzeko Aholku Kontseilua – guztiak ere gizarte zerbitzuen arloan eskumena duen departamentuari atxikiak– edo Herritarren Partaidetzarako Gizarte Kontseilua –governantzaren arloan eskumena duen departamentuaren mendekoa–.

Arestian adierazitakoaren eta Gizarte Zerbitzuei buruzko abenduaren 5eko 12/2008 Legeak lurralde historikoetako foro organoei agindutako eskumenen ondorioz, lege horren V. tituluan arautzen baita ekimen pribatuaren esku-hartzea, lankidetzako formulak definituta eta irabazi asmorik gabeko gizarte ekimenari babes publikoa ematea ezarrita, Gipuzkoako Foru Aldundiak zenbait ekintza aitzindari egin ditu Gipuzkoan Elkarrizketa Zibilerako Mahaia sortzeko, eta ekintza horietatik dator foru dekretu hau.

Aurrekari horiekin, foru dekretu honen helburua da sustatzea eta laguntzea Gipuzkoako Foru Aldundiaren eta hirugarren sektore sozialaren arteko elkarrizketa, lankidetzazko gobernantzarako, Gipuzkoako Elkarrizketa Zibilerako Mahaiaren bidez, politika publikoen diseinuan eta gauzatzean benetako eragina izango duten akordioak eraikitzeko eta hirugarren sektore sozialari aukera eman diezaioten horien inguruko konpromisoa hartzeko, epe eta modu egokian jasotako informaziotik eta partaidetza efektibotik abiatuta.

Hala, testuaren lehen artikuluetan antolatzen dira xedea eta helburuak, izaera eta adskripzioa, eta argi geratzen da Gipuzkoako Elkarrizketa Zibilerako Mahaia eratzen dela Gipuzkoako hirugarren sektore sozialeko eragileek gizarte zerbitzuetan eskumena duen departamentuaren politika publikoen diseinu eta ebaluazioan parte hartzea bideratzeko gainerako kontseilu, batzorde, mahai eta foroen osagarri gisa.

Hasierako xedapen orokorretan errepikatzen dira Euskadiko Hirugarren Sektore Sozialari buruzko maiatzaren 12ko 6/2016 Legeko zenbait definizio, legearen printzipioak zuzenean eta osorik aplikatu baitaitezke.

Foru dekretuaren hasierako xedapen orokorretan aipatzen dira xedea, organo berriaren izaera, gizarte ekintzako eta elkarrizketa zibileko hirugarren sektorearen kontzeptua, eta, ondoren, foru dekretu honetan arautzen dira Gipuzkoako Elkarrizketa Zibilerako Mahaiaren antolamendua eta funtzionamendua, adierazita osaera eta erregimen orokorra, eta bereizita kide

bakarreko eta kide anitzeko hainbat organo. Kide anitzeko organoen artean aipatu behar dira Osoko Bilkura, Batzorde Iraunkorra eta batzordeak; aldiz, kide bakarreko organoak dira ohikoak: lehendakaria, lehendakariordea eta kideak, baita idazkaria ere. Foru dekretuan jasotzen da kanpoko laguntza teknikoa izateko aukera –ez da derrigorrezko organoa–, Mahaiari laguntza teknikoa eta dinamizazioa emateko.

Kontuan izanda Gipuzkoako Elkarrizketa Zibileko Mahaiak burutu beharreko zereginak, egoki da Gipuzkoako Foru Aldundian gizarte zerbitzuen arloan eskumena duen departamentuari atxikita egotea.

Halaber, adierazi behar da foru dekretu honek betetzen dituela erregulazio onaren printzipioak; hartara, arautzeko eta erakundea antolatzeko gaitasuna baliatuta, Gipuzkoako Foru Aldundia jarduten da beharraren, eraginkortasunaren, proportzionaltasunaren, segurtasun juridikoaren, gardentasunaren eta efizientziaren printzipioen arabera.

Foru dekretu hau premiaren eta efikaziaren printzipioetara egokitzeari dagokionez, foru dekretuak Euskadiko hirugarren sektore sozialari buruzko maiatzaren 12ko 6/2016 Legearen 7. artikuluan du oinarria, bertan arautzen baita Elkarrizketa Zibila eta aldundiei mandatua egiten baitzaie egoki diren tresnen bidez elkarrizketak izan ditzaten Euskadiko Elkarrizketa Zibilerako Mahaiaren pare, baina beren lurraldeetan jarduten diren hirugarren sektore sozialeko sareekin.

Halaber, foru dekretu honetan jasota dago atariko honetan adierazitako helburuak lortzeko ezinbesteko erregulazioa.

Foru dekretu honek betetzen du segurtasun juridikoaren printzipioa ere, bere edukia bat datorrelako Euskadiko hirugarren sektore sozialari buruzko maiatzaren 12ko 6/2016 Legean eta gainerako ordenamendu juridikoan ezarritakoarekin, inolako inkoherentzia edo kontraesanik gabe.

Halaber, adierazi behar da foru dekretu honetan ezarritako kargak egokiak direla ezarritako helburua betetzeko eta, ondorioz, osaerak betetzen du eraginkortasunaren printzipioa.

Azkenik, eta gardentasunaren printzipioari dagokionez, entzunaldia, kontsulta eta jendaurreko erakustaldiaren izapideen bidez arau hau egiteko prozesuaren dokumentazioa eskuratzeko eta aktiboki parte hartzeko aukera eman zaie arauaren balizko hartzaileei.

Zehazki, alorrean ordezkaritza duten subjektu eta taldeekin kontsultatu da eta ez dute proposamenik egin. Ondoren ireki den entzunaldi eta informazio publikoko epean entitate eta elkarteek ekarpenak jaso dira, eta horietako batzuk kontuan hartu dira, Gizarte Politiketako Departamentuaren ustez, foru dekretuaren idazketa eta testua hobetze aldera.

Horiek horrela, Gizarte Politiketako foru diputatuak proposaturik, eta Diputatuen Kontseiluaren gaurko bileran eztabaidatu eta onartu ondoren,

XEDATZEN DUT

1. artikulua. Xedea.

Foru dekretu honen xedea da Gipuzkoako Elkarrizketa Zibilerako Mahaia sortzea eta arautzea.

2. artikulua. Izaera eta helburuak.

1. Gipuzkoako Elkarrizketa Zibilerako Mahaia eratzen da Gipuzkoako Foru Aldundiaren eta Gipuzkoako hirugarren sektore sozialeko sareen arteko elkarrizketa zibilerako organo gisa, aholku organo formarekin eta helburu hauekin:

a) Elkarrekin definitzea hirugarren sektore sozialera zuzendutako politiken ildo nagusiak, baita hirugarren sektore sozialeko entitateen eta Foru Aldundiaren artean adostutako gainerako politika publikoak ere.

b) Sustatzea hirugarren sektore sozialaren lan eremuen inguruko hausnarketa partekatuak.

c) Bideratzea lurraldeko hirugarren sektore sozialeko entitateen eskaerak eta, horien bitartez, esku-hartze sozialaren hartzaile eta protagonista diren pertsona, familia, kolektibo eta komunitateenak; iritzia emateko eta politika publikoetan parte hartzeko aukera ematea.

2. Gipuzkoako Elkarrizketa Zibilerako Mahaia elkarrizketarako eta lankidetzarako gune egonkorra da, noranzko bikoia eta operatiboa, eta, beraz, bertatik sortzen dira proiektuak eta lankidetzako beste ekimen batzuk.

3. Gipuzkoako Elkarrizketa Zibilerako Mahaia atxikitzen zaio Gipuzkoako Foru Aldundian gizarte zerbitzuetako eskumena duen departamentuari, administrazio kudeaketaren ondorioetarako, eta departamentu horretako titularrak izendatzen duen zuzendaritzari dagokio funtzionatzeko behar duen laguntza ematea.

3. artikulua. Ekintza sozialeko hirugarren sektorea.

1. Gizarte ekimeneko erakundeak dira, Gipuzkoako hirugarren sektore sozialeko parte direnak, Gipuzkoako gizartetik sortu direnak eta Euskadiko Hirugarren Sektore Sozialari buruzko maiatzaren 12ko 6/2016 Legearen 3. artikuluan ezarritako ezaugarriak dituztenak.

2. Gizarte ekintzako hirugarren sektorearen parte dira erakunde pribatu, antolatu eta irabazi asmorik gabeak, nagusiki jarduten direnak elkartasun soziala sustatzen, baita pertsonen parte-hartze soziala, giza eskubideak, inklusioa eta kohesio soziala sustatzen ere Gipuzkoako Lurralde Historikoaren esparruan.

3. Esku-hartze sozialeko jarduerak dira Euskadiko Hirugarren Sektore Sozialari buruzko maiatzaren 12ko 6/2016 Legearen 4. artikularen 1 eta 2. ataletan ezarritakoak.

4. Foru dekretu honen ondorioetarako, Gipuzkoako hirugarren sektore sozialeko sareak izango dira Gipuzkoako hirugarren sektore sozialeko bigarren mailako eta goragoko erakundeak, beste batzuk ordezkatzeko dituztenak, baita Gipuzkoako hirugarren sektore sozialeko esku-hartze zuzena duten erakundeak ere, kolektibo jakin bat ordezkatzeko dutenak, hori ordezkatzeko duen sarerik ez badago Gipuzkoako Lurralde Historikoan.

Kontzeptu horretan sartzen dira Euskadiko hirugarren sektore sozialeko sareak, beren egitura territorializatua ez dutenak, baldin eta Gipuzkoan eta gizarte politiken eremu espezifikoan ez badago aurreko paragrafoan aipatu diren ezaugarriak dituen hirugarren sektore sozialeko erakunderik.

5. Aurreko ataletan aipatutako erakundeek izena emanda egon beharko dute maiatzaren 12ko 6/2016 Legearen 5. artikuluan jasotako Euskadiko Hirugarren Sektore Sozialeko Erakundeen Erroldan.

4. artikulua. Elkarrizketa zibila.

Gipuzkoako Elkarrizketa Zibilerako mahaiaren bidez gauzatzen den elkarrizketa zibilaren printzipioaren arabera, esku-hartze sozialaren protagonista diren pertsona, familia, kolektibo eta komunitate hartzaile eta protagonistek eskubide hauek izango dituzte:

a) Esku-hartze sozialaren eremuko politika publikoetan parte hartzea, esku-hartze hori Hirugarren Sektore Sozialari buruzko maiatzaren 12ko 6/2016 Legeak 4.1 artikuluan xedatutakoaren arabera ulertuta; betiere Gipuzkoako Foru Aldundiari, batez ere gizarte politiken ardura duen departamentuari, eta, hala badagokio, Batzar Nagusiei dagozkien erabaki ahalmenei kalterik egin gabe. Hori guztia beste erakunde eta sare batzuek edozein foru departamenturen kontsulta organoetan edo partaidetza ekimenetan parte hartzea eragotzi gabe.

b) Esku-hartze sozialaren eremuko jardueri buruzko iritziak ematea. Administrazioak elkarrizketa irekia, gardena eta ohikoa izango du haiekin, Gipuzkoako Elkarrizketa Zibilerako Mahaiaren bitartez eta, hala badagokio, kontsulta organoetan edo horretarako garatzen diren prozesu espezifikoetan parte hartuz.

5. artikulua. Gipuzkoako Elkarrizketa Zibilerako Mahaiaren funtzioak.

Kontsultakoa denez, Gipuzkoako Elkarrizketa Zibilerako Mahaiari dagokio besteak beste, funtzio hauek burutzea:

a) Foru dekretu honetan aipatutako gaietarako irizpenak, ebazpenak, gomendioak edo txostenak egitea, bere kabuz edo Foru Aldundiak eskatuta.

b) Gipuzkoako Foru Aldundiari proposamenak egitea bere esku-hartzearen xede diren kolektiboetarako zuzendutako politiketarako lerro estrategikoen eta jarduteko lehentasunen inguruan, Gipuzkoako Lurralde Historikoaren esparruan.

c) Departamentuaren plangintza tresnen ebaluazioari ekarpenak egitea bere jardun esparruan.

d) Hirugarren sektore sozialari buruzko ikerketak edo azterlanak egitea, Gipuzkoako Elkarrizketa Zibilerako Mahaiaren interes bereziko eremu zehatzetan.

e) Gipuzkoako Foru Aldundiak eskatuta, lotesleak izango ez diren txostenak egitea gai hauek berariaz jorratzen dituzten arau-ekimenei buruz: gizarte-partaidetza eta boluntarioria, elkartasunaren sustapena, gizarte-eskubideak, inklusioa, gizarte-kohesioa, aniztasuna eta gizarteratzea eta enplegua.

6. artikulua. Gipuzkoako Elkarrizketa Zibilerako Mahaiaren osaera.

Hauek dira Gipuzkoako Elkarrizketa Zibilerako Mahaiko kideak:

— Gipuzkoako Foru Aldundia.

— Foru dekretu honen 3. artikulua laugarren atalean aipatutako Gipuzkoako hirugarren sektore sozialeko sareak.

7. artikulua. Mahaiko kideen agintaldia.

1. Gipuzkoako Elkarrizketa Zibilerako Mahaia hirugarren sektore sozialeko sareen ordezkari gisa osatzen duten pertsonen agintaldia lau urtekoa izango da, eta agintaldia amaitzean berriz hautatu ahal izango dira. Aipatutako epea igaro ondoren, beren eginkizunak betetzen jarraituko dute, beren ondorengoaren izendapenak ondorioak izan arte.

2. Lehendakariaren eta beren karguagatik Mahaiko kide diren gainerako kideen agintaldia beren karguetan dauden bitartekoa izango da.

3. Mahaikideen agintaldia iraunaldia amaitu baino lehen amaitu ahal izango da, honako kasu hauetan:

a) Ezeztatzea edo kargutik kentzea Gipuzkoako Foru Aldundiaren gizarte zerbitzuetan eskumena duen departamentuko titularrak erabakita, ofizioz edo izendatzea proposatu zuen sare edo entitateak eskatuta.

b) Karguagatik izendatu zituzten pertsonak izendapena eragin zuen izaera galtzea.

c) Uko egitea, organoko lehendakariari aurkeztuta.

d) Heriotza.

e) Kargu publikoetan jarduteko desgaitzen edo eteten duen ebazpen judizial edo administratibo irmoa izatea.

4. Aurreko atalean aurreikusitako kasuetan, ordezkapenak izango dira ordezkaturako pertsonaren agintaldiari geratzen zaion denborarako.

5. Artikulu honen lehen atalean lau urteko agintaldia aurreikusi den arren, bi urtero Gipuzkoako Foru Aldundian gizarte zerbitzuetan eskumena duen departamentuko titularrak ebaluatuko du Euskadiko Hirugarren Sektore Sozialaren sareen egoera, bereziki sare sozial berriak eratu diren edo lehendik badagoenen bat desagertu den edo jarduteari utzi dion. Ebaluazio hori egingo da izendapenak adosteko, xedapen honen 9. artikuluan ezarritako prozeduraren eta mugen baitan.

8. artikulua. Emakumeen eta gizonen presentzia orekatua kide anitzeko organoetan.

Gipuzkoako Elkarrizketa Zibilerako Mahaiko kide anitzeko organo guztietako kide izango diren pertsonak izendatzerakoan, emakumeen eta gizonen presentzia orekatua izan beharko da, Emakumeen eta Gizonen berdintasunerako martxoaren 9ko 2/2015 Foru Arauarekin bat etorriz.

9. artikulua. Osoko Bilkura.

1. Gipuzkoako Elkarrizketa Zibilerako Mahaiaren Osoko Bilkura honako pertsona hauek osatuko dute:

a) Lehendakaria Gipuzkoako Foru Aldundian gizarte zerbitzuen arloan eskumena duen departamentuko titular den diputatua izango da.

b) Lehendakariordea, Mahaiko kide diren Gipuzkoako hirugarren sektore sozialeko sareko ordezkariak beren artean izendatutako pertsona izango da.

c) Gipuzkoako Foru Aldundia ordezkatzeko duten lau kide, gizarte zerbitzuen arloan eskumena duen departamentuko foru diputatu titularrak izendatuak; horietako bat herritarren partaidetzaren arloan eskumena duen departamentuari dagokio. Halaber, kide horietako bat Euskadiko Udalen Elkarte-Asociación de Municipios Vascos Eudel erakundeak proposatuta ere izendatu ahal izango da.

d) Hirugarren sektore sozialeko sare bakoitzaren ordezkari bat; sare horiek proposatuta, gizarte zerbitzuen arloan eskumena duen departamentuko foru diputatu titularrak izendatuko ditu. Hirugarren sektore sozialeko sareek ordezkariak ere izendatu beharko dituzte, titularrak ez daudenean haien funtzioak betetzeko.

e) Bi ordezkari, Gipuzkoako hirugarren sektore sozialeko erakundeek proposatuak, baldin eta aurreko letran aipatutako sareetakoak ez badira, txikiak badira eta sareek ordezkatzeko dutenaz bestelako eremu batekoak badira.

f) Idazkaria.

2. Departamentuko titularrak hirugarren sektore sozialen sareko ordezkariak izendatzeko, aintzat hartuko dira ordezkagarritasuna, gizarte zerbitzuen esparruan duten ekintza eremuen aniztasuna eta genero ikuspegia. Ordezkagarritasun maila zehazteko kontuan izango dira elkartzeko pertsonen kopurua, Gipuzkoako Lurralde Historikoan duen hedadura eta departamentuko titularrak libreki haztatutako beste edozein datu. Edonola ere, gehienez ere 25 sare egongo dira ordezkariak.

3. Idazkaritzaren eta kanpoko laguntza teknikoaren ordezkariak bileretara joango dira, hitzarekin baina botorik gabe.

4. Osoko Bilkuretara beste pertsona batzuk ere joan ahal izango dira, baldin eta lehendakariak, bere kabuz edo Osoko Bilkurako kideek eskatuta, egoki jotzen badu aztertuko diren gaien inguruan duten ezagutzagatik. Pertsona horiek hitza izango dute, baina botorik ez.

5. Gipuzkoako Elkarrizketa Zibilerako Mahaiaren Osoko Bilkura urtean hiru aldiz bilduko da, gutxienez, ohiko bilkuran, eta ezohikoan, lehendakariak bere ekimenez edo Osoko Bilkurako kideen erdiak eskatuta deitzen duenean.

6. Osoko Bilkurari dagozkio hauek:

— Jardueraren urteko memoria onartzea.

— Egoki bada, barne funtzionamenduko erregelamendua onartzea.

— Batzordeak sortzea, haien eginkizunak zehaztea eta batzordekideak izendatzea.

— Batzorde Iraunkorreko kideak izendatzea.

— Gipuzkoako Elkarrizketa Zibilerako Mahaiaren eginkizun guztiak, beste organo batzuei berariaz esleitu ez bazaizkie.

7. Lehendakariari dagokio, Idazkariaren bidez, bilerak deitzea, gutxienez hamar egun balioduneko aurrerapenarekin, eta gai zerrenda jartzea. Deialdia egiteko epea berrogeita zortzi ordura murriztu ahal izango da urgentziatzko kasuetan.

8. Osoko Bilkura eratzeko quoruma izango da Osoko Bilkurako kideen gehiengo osoa bertaratzea. Nolanahi ere, Lehendakaria eta Idazkaria bertaratu beharko dira.

9. Osoko Bilkuretara joan ezin diren Osoko Bilkurako kideek beren botoa eskuordetu ahal izango diote Osoko Bilkurako beste kide bati. Eskuordetzea presidenteari zuzendutako idazki baten bidez egin beharko da. Idazki horretan botoa eskuordetzen duen pertsonaren eta eskuordetzea jasotzen duen pertsonaren izen-abizenak jaso beharko dira, baita eskuordetzea zein eztabaida eta bozketetan baliatuko den ere. Inork ezingo du boto eskuordetu bat baino gehiago izan, eta eskuordetzea saio baterako baino ezin da egin.

10. artikulua. Batzorde Iraunkorra.

1. Mahaiaren Osoko Bilkurak bere kideen artean aukeratuko ditu Batzorde Iraunkorreko kideak.

2. Batzorde Iraunkorra honako hauek osatuko dute:

— Mahaiaren Osoko Bilkurako lehendakaria; Batzorde Iraunkorreko lehendakaria izango da.

— Bi kide izango dira Gipuzkoako Foru Aldundiak Mahaian dituen ordezkariak.

— Bi kide izango dira hirugarren sektore sozialeko sareek Mahaian dituzten ordezkariak.

— Kide bat proposatuko dute Gipuzkoako hirugarren sektore sozialekoak diren, 9.1.d) artikuluan aipatutako sareen parte ez diren eta sareek ordezkatzeko dutenaz bestelako esparrukoak diren erakunde txikiek.

3. Batzorde Iraunkorrek aztertu eta landuko ditu, Mahaiaren Osoko Bilkura egin aurretik, deialdietako gai zerrendetan sartutako gaiak. Gainera, Mahaiaren Osoko Bilkura egin arte itxaron ezin duten gaiak joratu ahal izango ditu.

4. Batzorde Iraunkorrari aplikatuko zaizkio Osoko Bilkuraren funtzionamendua arautzen duten xedapenak, beti ere bere izaerarekin eta osaerarekin bateragarriak badira.

11. artikulua. Batzordeak.

1. Hobe funtzionatzeko, Gipuzkoako Elkarrizketa Sozialerako Mahaiak batzordeak eratu ahal izango ditu.

2. Batzordeak dira Osoko Bilkuraren kide anitzeko organo osagarriak, bere eskumenekoa den edozein gai prestatzeko azterketa, txosten edo kontsultak prestatzeko funtzioak dituenak. Batzordeen txostenak edo irizpenak ez dira inola ere betearazpen akordio izango.

3. Batzorde horietako kideak Osoko Bilkurak izendatuko ditu eta nahitaez izango dituzte Osoko Bilkurako bi kide; bat izango da Foru Aldundiaren ordezkaria eta, bestea, hirugarren sektore sozialeko sareena. Halaber, Osoko Bilkurako kide ez diren pertsonak ere izendatu ahal izango dira.

4. Batzordeak iraunkorrek edo bereziak izan daitezke.

5. Batzorde iraunkorrek dira Osoko Bilkurak arlo jakin baten inguruan eratzen dituenak agintaldi guztirako. Batzorde horiek automatikoki desegingo dira Osoko Bilkura berritzen denean.

6. Batzorde bereziak dira Osoko Bilkurak gai jakin baterako eta epe laburrerako eratzen dituenak. Batzorde horiek automatikoki azkentzen dira, haien xede den gaiari buruzko irizpena edo txostena ematen denean.

7. Batzordeek ematen dituzten irizpenak edo txostenak ez dira lotesleak izango.

8. Osoko Bilkurak erabaki dezake gai jakin bat bi batzordek edo gehiagok batera aztertzea.

9. Batzordeek, egiten duten lehen bileran, zehaztuko dute bileren araubidea, eta indarrean jarraituko du aldatzea adosten ez den bitartean; edonola ere, ezohiko bilera deitu ahal izango dira, lehendakariaren iritziz gaiaren garrantziagatik edo urgentziagatik beharrezkoa bada.

10. Batzordeak ezin izango dira eratu edo jardun Lehendakaria eta Idazkaria, edo haien ordezkioak, bertan ez badaude.

11. Ezein batzordek ezin izango du eztabaidatu beste batzorderen baten eskumeneko gaiak buruz.

12. Emandako botoen gehiengo soilez onartuko dira txostenak edo irizpenak.

13. Batzordeen bilera bakoitzaren akta egingo da eta idazkariak eta lehendakariak sinatuko dute; bertan jasoko dira bileraren hasiera eta amaiera ordua, bertaratutako izenak, aztertutako gaiak eta egindako txosten edo irizpenak.

12. artikulua. Lehendakaria.

Gipuzkoako Elkarrizketa Zibilerako Mahaiko lehendakariak honako eginkizun hauek ditu:

- a) Gipuzkoako Elkarrizketa Zibilerako Mahaiaren ordezkari izatea.
- b) Bilerak deitzea, bileretan buru izatea eta eztabaidak moderatzea.
- c) Bilkuretako gai zerrenda egitea.
- d) Erabakitakoa bete dadin agintzea eta aktak ikus-onestea.
- e) Kide anitzeko organo baten lehendakaritzari datxekion beste edozein eginkizun betetzea.

13. artikulua. Lehendakariordea.

1. Lehendakariordeak beteko ditu lehendakariak eskuordetu dizkion funtzioak eta bere izaerari dagozkionak.

2. Kargua hutsik badago, edo lehendakaria kanpoan edo gaixorik badago, lehendakariordeak ordezkatu du lehendakaria bere egiteko guztietan.

14. artikulua. Idazkaria.

1. Gipuzkoako Elkarrizketa Zibilerako Mahaiko idazkaria gizarte zerbitzuen arloan eskumena duen departamentuko funtzionario bat izango da, eta haren titularrak izendatuko du.

2. Idazkariaren kargua hutsik badago, idazkaria kanpoan edo gaixorik badago, eta, oro har, justifikatutako arrazoiren bat badago, haren ordeztu departamentuko funtzionario bat egongo da, eta haren titularrak izendatuko du.

3. Gipuzkoako Elkarrizketa Zibilerako Mahaiko idazkariari dagokio:

a) Bileretara joatea, hitzarekin baina botorik gabe.

b) Lehendakariaren aginduz, Mahaiaren bilkuretarako deia egitea, bai eta mahaikideei dei egitea ere.

c) Mahaikideen komunikazioak jasotzea, bai eta jakinarazpenak, datu eskaerak, zuzenketak edo ezagutu beharreko beste edozein idazki ere.

d) Gaiak bideratzeko prestatzea.

e) Gipuzkoako Elkarrizketa Zibilerako Mahaiaren bileren aktak egitea eta sinatzea, Lehendakariaren oniritziarekin.

f) Kontsulten, txostenen, irizpenen eta hartzen diren erabakien ziurtagiriak egitea.

g) Dagozkien zerbitzuen bidez, Gipuzkoako Elkarrizketa Zibilerako Mahaiaren Osoko Bilkura, Batzorde Iraunkorra eta Batzordeak osatzen dituzten gainerako pertsoneri beharrezko informazioa eta laguntza teknikoa ematea, eman zaizkien eginkizunak bete ditzaten.

h) Mahaiaren jarduketan legezotasun formala eta materiala zaintzea, eta eratzeko eta erabakiak hartzeko prozedurak eta arauak errespetatzen direla bermatzea.

i) Idazkari izateak berez dakartzan gainerako eginkizun guztiak.

15. artikulua. Laguntza teknikoa.

Gipuzkoako Elkarrizketa Sozialerako Mahaiak kanpoko laguntza teknikoa eduki ahal izango du, honako eginkizun hauekin:

a) Gipuzkoako Elkarrizketa Zibilerako Mahaiaren bilkuretara joatea, hitzarekin baina botorik gabe.

b) Gipuzkoako Elkarrizketa Zibilerako Mahaiaren jarduera dinamizatzea eta bertako kideekin modu proaktiboan jardutea, hura betetzeko adosten diren helburuei dagokienez.

- c) Idazkari karguari datxezkion eta hark eskuordetutako beste edozein eginkizun betetzea.

16. artikulua. Kide anitzeko organoek erabakiak hartzea.

1. Gipuzkoako Elkarrizketa Zibilerako Mahaiko kide anitzeko organoen bilkurak ez dira publikoak izango; bai, ordea, txostenak, irizpenak, ebazpenak edo gomendioak, eta horien berri emango da Gipuzkoako Foru Aldundiaren webgunean horretarako jarritako gunearen bidez.

2. Kide anitzeko organoen bilkurak aurrez aurre edo urrutitik egin ahal izango dira, komunikazioaren teknologien bidez, bilkura bakoitzaren deialdian ezartzen diren baldintzetan.

3. Kide anitzeko organoek urrutitik egiten dituzten bilkuretan, organo horietako kideak leku desberdinetan egon ahal izango dira, baldin eta, bitarteko elektronikoen bidez –halakotzat jotzen dira telefonozkoak eta ikus-entzunezkoak–, bermatzen bada bertaratutako pertsonen identitatea, haien adierazpenen edukia, adierazpen horiek egiten diren unea, haien arteko denbora errealeko elkarreragina eta interkomunikazioa eta bilkuran zehar bitartekoak eskuragarri izatea. Baliabide elektronikoa baliadunak izango dira, esaterako, posta elektronikoa, audiokonferentziak eta bideokonferentziak.

4. Gipuzkoako Elkarrizketa Zibilerako Mahaiaren izaera dela eta, erabakiak adostasunez hartuko dira, bereziki lankidetzan sustatu beharreko proiektuen edo adierazpen publikoen kasuan. Adostasun hori ezinezkoa izan eta erabaki bat hartu behar denean, erabakiak gehiengo bikoitzaren sistemaren bidez hartuko dira: Foru Aldundia ordezkatzeko duten kideen gehiengoa eta hirugarren sektore sozialeko sare eta erakundeetako ordezkarien gehiengoa.

17. artikulua. Kide anitzeko organoen aktak.

1. Kide anitzeko organoak egiten duen bilkura bakoitzaren akta egingo du idazkariak. Akta horretan, nahitaez, honako hauek zehaztuko dira: bertaratutakoak, bileraren gai zerrenda, bilera non eta noiz egin den, eztabaiden puntu nagusiak eta hartutako erabakien edukia.

2. Kide anitzeko organoak egindako bilkurak grabatu ahalko dira. Grabaziotik lortzen den fitxategia, grabazioaren autentikotasunari eta osotasunari buruz idazkariak egindako ziurtagiria eta bilkuran euskarri elektronikoa erabiltzen diren dokumentu guztiak bilkura aktarekin batera jarri ahal izango dira, eztabaiden puntu nagusiak aktan jaso gabe.

3. Bilkura bakoitzeko akta bilkuran bertan edo hurrengo bilkuran onartu ahal izango da. Idazkariak egingo du akta, lehendakariaren oniritziarekin, eta bitarteko elektronikoen bidez igorriko die kide anitzeko organoko kideei. Kide horiek, bide berak erabiliz, testuarekiko adostasuna edo eragozpenak adierazi ahal izango dituzte, testua onar dadin; baiezkoa emanaz gero, bileran bertan onartutzat joko da.

4. Bilkurak grabatzea edo euskarri elektronikoko dokumentuak erabiltzea aukeratu bada, fitxategi elektronikoak gorde beharko dira osotasuna eta benetakotasuna bermatzeko moduan, bai eta kide anitzeko organoko kideei fitxategi horietarako sarbidea bermatzeko moduan ere.

18. artikulua. Gastuak.

Mahaiko kideek eskubidea izango dute Mahaiaren bileretara joateak eragindako gastuen kalte-ordaina jasotzeko, zerbitzuen ondoriozko kalteordainei buruzko otsailaren 2ko 16/1993 Dekretuan -Eusko Jaurlaritzarena- edo hori ordeztzen duen xedapenean aurreikusitako baremoen arabera.

19. artikulua. Finantzazioa eta laguntza.

1. Gipuzkoako Elkarrizketa Zibilerako Mahaiaren berezko eginkizunak behar bezala betetzeko, eta bere helburuak lortzen laguntzeko, Gipuzkoako Foru Aldundian gizarte zerbitzuen arloko eskumena duen departamentuak baliabide ekonomikoak jarriko ditu. Baliabide ekonomiko horiek Gipuzkoako Foru Aldundiaren Aurrekontu Orokorretan horretarako ezarritako aurrekontu partidetatik etorriko dira.

2. Departamentu horrek behar dituen baliabideak emango dizkio Gipuzkoako Elkarrizketa Zibilerako Mahaiari, bere eginkizuna betetzeko behar dituen baliabide teknologiko, pertsonal eta juridikoak jarritz.

Xedapen gehigarri bakarra. Osoko Bilkura eratzeko bilkura.

1. Gipuzkoako Elkarrizketa Zibilerako Mahaiaren Osoko Bilkura eratzeko bilkura egiteko, Foru Aldundian gizarte zerbitzuen arloko eskumena duen departamentuak, foru dekretu hau Gipuzkoako Aldizkari Ofizialean argitaratzen den egunaren biharamunetik kontatzen hasita hogeiei egun naturaleko epean dei egingo die xedapen iragankor bakarrean aipatzen diren hirugarren sektore sozialeko sare eta erakundeei, Osoko Bilkurako kide izateko bi pertsona fisiko izendatzeko proposamenak aurkez ditzaten, bata titular gisa eta bestea ordezeko gisa.

2. Izendapen proposamen horietan, parte hartzera gonbidatutako sareek eta erakundeek kontuan hartu beharko dute Osoko Bilkuran emakumeen eta gizonen presentzia orekatua bermatzeko helburua.

3. Proposamen horiek aipatutako departamentuko titularrari zuzendu beharko zaizkio, iragarkia argitaratzen den egunaren biharamunetik kontatzen hasita hogeiei egun naturaleko epean.

4. Epe hori amaituta, departamentuko titularrak hogeit hamar egun naturaleko epean izendatuko ditu, eta Osoko Bilkurako kideak deituko ditu, Gipuzkoako Elkarrizketa Zibilerako Mahaia eratzeko bilkura egin dezaten.

5. Izendapen proposamena egiteko, kontuan hartuko da Osoko Bilkuran emakumeen eta gizonen presentzia orekatua bermatzeko helburua, eta, horretarako, hirugarren sektoreko sare eta erakunde bakoitzak proposatutako bi pertsonetako edozein proposatu ahal izango da titular gisa.

Xedapen iragankor bakarra. Gipuzkoako hirugarren sektore sozialeko sareak.

1. Euskadiko Hirugarren Sektore Sozialeko Erakundeen Errolda sortzen duen martxoaren 7ko 33/2023 Dekretua 2023ko apirilaren 27ko Euskal Herriko Agintaritzaren Aldizkarian argitaratu ondoren, hura indarrean jarri eta hurrengo sei hilabeteak igaro arte, ez da aplikatuko foru dekretu honen 3. artikulua 5. apartatua, Gipuzkoako Hirugarren Sektore Sozialeko sareak aipatutako Erroldan nahitaez inskribatzeari buruzkoa, Gipuzkoako Elkarrizketa Zibilerako Mahaian parte hartzeko.

2. Epe hori igarota, Gipuzkoako Elkarrizketa Zibilerako Mahaitik kanpo geratuko dira, automatikoki, erroldan inskribatuta ez dauden sare guztiak.

3. Trantsizio aldi horretan, Gipuzkoako hirugarren sektore sozialeko saretzat hartuko dira honako sare hauek:

- a) Astialdi Sarea.
- b) ONGD.
- c) EAPN Euskadi.
- d) EHLABE.
- e) Elkartu.
- f) Euskal Gorrak.
- g) Agijupens.
- h) GKEF-FDAG.

- i) Fevas.
- j) Gizatea.
- k) Harresiak Apurtuz.
- l) Hedatzen.
- m) Sargi.
- n) Lares.
- ñ) Reas Euskadi.

4. Martxoaren 7ko 33/2023 Dekretua indarrean jarri eta ondorengo sei hilabeteko epea luzatu ahal izango da, salbuespen gisa, gizarte zerbitzuen arloan eskumena duen departamentuaren titularraren foru agindu bidez, baldin eta errolda ez badago martxan dekretu hura onartu eta berehala, edo epea luzatzea gomendatzen duen aparteko beste inguruabarren bat gertatzen bada.

Azken xedapenetako lehena. Ordezko araubidea.

Foru dekretu honetan aurreikusi ez den guztian, aplikatuko da Administrazio Publikoen Administrazio Prozedura Erkidearen urriaren 1eko 39/2015 Legean eta Sektore Publikoaren Araubide Juridikoaren urriaren 1eko 40/2015 Legean xedatutakoa, bereziki, prozedurazko gaiei eta kide anitzeko organoen funtzionamenduari buruzko gaiei dagokienez.

Azken xedapenetako bigarrena. Araugintza.

Gipuzkoako Foru Aldundian gizarte zerbitzuen arloan eskumena duen departamentuko foru diputatu titularrari ahalmena ematen zaio foru dekretu honetan aurreikusitakoa garatu, betearazi eta aplikatzeko beharrezkoak diren xedapenak emateko.

Azken xedapenetako hirugarrena. Indarrean jartzea.

Foru dekretu hau Gipuzkoako Aldizkari Ofizialean argitaratu eta ondorengo egunean jarriko da indarrean.